

吳郡志附校勘記四





吳 郡 志

附校勘記  
(四)

范成大撰

# 吳郡志卷二十四

## 人物

張裕字茂度。敝之子。爲廣州刺史。綏靜百越。嶺外安之。解職還家。徵爲都官。固辭以疾。就加金章紫綬。茂度內足於財。自絕人事。經始本縣之華山爲居止。優遊野澤。如此者七年。爲會稽太守。有吏能。職事甚理。卒於官。諡曰恭子。子演。位太子中舍人。弟鏡。永。辯。岱。俱知名。時謂張氏五龍。

張鏡。裕之次子。少與顏延之隣居。延之常談義。飲酒喧呼。鏡靜默無言聲。後鏡與客談。延之從籬邊聞之。取胡牀坐聽。辭義清深。延之心服。謂客曰。彼有人焉。由是不復酣叫。仕至新安太守。

張永字景雲。裕之第三子。涉獵書史。能爲文章。善隸書。騎射雜藝。觸類兼善。又有巧思。大爲文帝所知。紙墨皆自營造。上每得永表啓。輒執玩咨嗟。自歎供御者不及。授揚威將軍。都督諸將。經略河南。後爲青冀二州刺史。統諸將討薛安都。封孝昌縣侯。改吳郡太守。遷南兗州刺史。加都督。永少便驅馳。志在宣力。其爲將帥。能與士卒同甘苦。年雖老。志氣不衰。子瓌。仕齊。

張岱字景山。裕之幼子。仕爲東遷令。殷沖爲吳興太守。謂人曰。張東遷棲遲下邑。名器方顯。終當大至。歷臨海。豫章。晉安三王府諮議。自謂一心可以事百君。我爲政端平。待物以禮。悔吝之事。無由而及。徙益州刺史。益土安其政。齊建元初。爲吳郡太守。高帝知岱歷任清直。至郡未幾。手敕曰。大郡任重。未欲回換。但

總戎務殷。宜須望實。今用卿爲護軍。加給事中。岱拜竟。詔以家爲府。武帝卽位。復爲吳興太守。更以寬恕著名。遷南兗州刺史。未拜卒。諡貞。

張邵。字茂宗。裕之弟。初爲晉琅邪內史。王誕龍驤府功曹。桓元徒誕於廣州。親故咸離棄之。唯邵情禮彌謹。流涕追送。時寇亂年飢。又資饋其妻子。武帝以邵勤練憂公。補州主簿。邵悉心政事。精力絕人。帝受命。以佐命功。封臨沮伯。卒。諡曰簡。遺命祭以菜果。草席爲輜車。諸子從焉。子敷。

張敷。字景允。生而母亡。年數歲。問之。便有感慕之色。求母遺物。唯得一扇。緘錄之。每感思。輒開筭流涕。性整肅。風韻甚高。好讀元書。兼屬文論。少有盛名。帝見而愛之。與高士宗少文談繫象。少文曰。吾道東矣。於是名價日重。宋武帝召見。奇之。曰。眞千里駒也。仕至黃門侍郎。後軍司徒左長史。父亡。十餘日始進水漿。葬畢。不進鹽菜。毀瘠成疾。未基而卒。孝武旌其孝。追贈侍中。名其所居曰孝張里。

張暢。字少微。禕之子。少與從兄敷。演。鏡。齊名。爲後進之秀。元嘉中。累遷安北長史。魏太武南侵。至彭城。暢於城上與魏尙書李孝伯語。吐屬如流。音韻詳雅。風儀華潤。魏人相視歎息。改爲南譙王。義宣長史。元凶弑逆。義宣舉兵。暢哀容俯仰。蔭映當時。見者皆願爲盡命。事平。封夷道縣侯。義宣有異圖。暢遣門生苟僧寶下都。因顏竣。陳義宣釁狀。義宣敗。暢見原。轉侍中。會稽太守。卒。諡曰宣。

張緒。字思曼。演之子。少知名。清簡寡欲。從伯敷。及叔父鏡。並貴異之。鏡語人曰。此兒今之樂廣也。謝敷云。是我輩人。宋明帝每見緒。輒歎其清談。袁粲謂有正始遺風。出爲吳郡太守。齊建元初。爲中書令。素望甚

重。太祖深加敬異。王儉嘗云。北士中覓張緒。過江未有人。不知陳仲弓黃叔度能過否。長於易。言精理。與見宗一時。吐納風流。聽者皆忘飢疲。見者肅然。如在宗廟。雖終日與居。莫能測焉。益州獻蜀柳。狀若絲縷。武帝植之。靈和殿前。賞玩咨嗟。曰。此楊柳風流可愛。似張緒當年時。每朝見。世祖目送之。謂王儉曰。緒以位尊我。我以德貴緒。其見賞如此。緒口不言利。有財輒散之。清言端坐。或竟日無食。門生見緒飢。爲之辦殮。然未嘗求也。死之日。無宅以殯。遺命作蘆葭轎車。引柩。上置杯水香火。不設祭焉。謚簡子。子充仕齊。張瓌字逸祖。永之子。仕宋。不欲前兄瑋處祿。免官不拜。遭永喪還吳。昇明元年。劉秉有異圖。弟遐爲吳郡潛相。影響齊高帝密令瓌取遐。諸張世有豪氣。瓌與叔恕領兵十八人入郡斬之。郡內莫敢動者。事捷以告張沖曰。瓌以百口一擲出手得盧矣。卽授吳郡守。錫以嘉名。封義成縣侯。郡人顧嵩。陸閑。少年未知名。瓌引爲綱紀。後並立名。皆以爲知人。瓌以既有國秩。不取郡俸。高帝敕上庫別藏其俸。以表其清。鬱林之廢。朝臣參承明帝。瓌託脚疾不至。見朝廷多難。屢啓還吳。梁天監中卒。弟稷子率並仕梁。張沖字思約。數弟束之子。母戴顯女。有儀範。張氏內取則焉。沖少有至性。仕齊爲青冀二州刺史。沖父初卒。遺命曰。祭我必以鄉土所產。無用牲物。沖在鎮。四時還吳。取果菜流涕薦焉。後遷郢州。封定襄侯。梁武帝起兵。手書喻意。又遣辯士說之。沖確然不回。明年梁兵圍之。沖固守不出。病將死。屬府僚以誠節。言終而卒。贈散騎常侍護軍將軍。

張融字思光。暢之子。弱冠有名。神明俊出。機辯如流。道士同郡陸脩靜以白鷺羽塵尾扇遺之。曰。此旣異。

物以奉異人。仕宋爲封溪令。路經嶂嶮。獠賊執融。將殺食之。融神色不動。方作洛生詠。賊異之而不害也。融風止詭譎。見者驚異。聚觀齊高帝。素愛融。常笑曰。此人不可無一。不可有二。善草書。常自美其能。帝曰。卿書有骨力。但恨無二王法。答曰。非恨臣無二王法。亦恨二王無臣法。義宣之亂。官軍欲殺融。父暢。張興世。以袍覆暢而坐之。得免。興世卒。融著高履。負土成墳。興世子欣時。坐罪當死。融又啓。竟陵王欲代欣時死。王義之。建武中病卒。遺令建白旛。無旒。不設祭。三千買棺。無製新衾。有玉海集行于世。張氏前有敷。演鏡。暢後有充。融。卷。稷。弟寶積。

張寶積。何點謂爲保家之主。永元中。乘腰輿。謁蕭穎胄。舉動自若。穎胄問何至之晚。答曰。自本朝危亂。四海橫流。旣不能爲比干之死。實未忍爲微子之去。是以至晚。穎胄深善之。後仕御史中丞。

梁張稷。字公喬。瓊之弟。幼有至性。所生母喪。常設神坐。出告反面如事生。州里謂之淳孝。父母沒。廬墓六年。性疎率。明悟。有才略。仕齊衛尉卿。東昏之難。爲梁武佐命。然常愧之。徐道角作亂。見害。奉祿皆頒親故。家無餘財。與族兄充。融。卷。並知名。時號四張。子嶮。姪率。率弟盾。

張卷。字令遠。稷族兄。少以和理著稱。能清言。仕至都官尙書。

張嶮。字四山。稷子。少篤孝。年三十餘。猶斑衣受稷杖。方雅有志操。能清言。感家禍。終身蔬食布衣。不執刀。刀。不聽音樂。仕梁湘東王長史。王爲之筮。得節卦。謂嶮曰。卿後當東入爲郡。恐不得終其天年。嶮曰。貴得其所耳。爲吳興太守。侯景圍建鄴。遣弟伊。率兵赴援。賊將劉神茂。遣使說嶮。嶮斬其使。景遣侯子鑒擊嶮。

岷軍敗，釋戎服坐聽事。賊臨以刀，不屈。執送景，將舍之。岷曰：「速死爲幸。」與子孫同遇害者十餘人。景欲存其一子，岷曰：「吾一門已在鬼錄，不就爾處求恩，於是皆死。」元帝追贈開府儀同三司，諡忠貞子。弟舉亦知名。

張率，字士簡，瓌之子。性寬雅，十二能屬文。每日限爲文一篇。至年十六，凡作二千餘篇。陸少元家有書萬卷，率盡讀之。齊建武中，舉秀才。沈約目爲南金。梁武帝時，爲文德待詔。帝見其文，曰：「相如工而不敏，枚臯速而不工。卿可謂兼二子之全矣。」又謂曰：「卿東南物望，名家奇才。若復以禮律爲意，便是宰相才。祕書丞天下清官，東南望胄，未有爲之者。今以相處，爲卿定名譽，尋以爲祕書丞，出爲新安太守。率嗜酒，於家務尤忘懷。自少屬文，七略及藝文志所載詩賦，今亡其文者，並補作之。所著文衡十五卷，文集四十卷，行於世。

張盾，字士宣，率之弟。以謹重稱。爲湘東王記室，出監富陽令。廓然獨處，無所用心。身死之日，家無遺財。唯有文集，并書千餘卷，酒米數甕而已。

張種，字士苗，永從孫。祖辯，宋大司農。父略，太子中庶子。種少恬靜，居處雅正，旁無造請。時人語曰：「宋稱敷演，梁則卷充，清虛學尙，種有其風。」仕梁始豐令。母卒，毀瘠過甚。又迫凶荒，未葬，服雖畢，居家飲食，常若在喪。景平初，王僧辯以聞，起爲中從事，并爲具葬禮。葬訖，方卽吉。陳武帝受禪，累遷中書令。種沈深虛靜，識量宏博，時以爲宰相之器。卒，贈特進，諡元子。種雖歷顯位，家產屢空。終日晏然，不以爲病。

張稜仕梁種之弟清靜有識度位司徒左長史光祿大夫

張充字延符緒之子少好逸遊嘗臂鷹牽狗吳西郭中年三十便脩改多所該通尤明老易能清言與從叔稷俱有令譽仕齊歷尚書殿中郎王儉用事方聚親賓充穀巾葛帔至便求酒言論放逸一坐盡傾遷義興太守爲政清淨入爲侍中梁武帝兵至建鄴東昏遇禍百官集西鍾下召充充不至歷梁吏部尚書居選以平允稱遷尚書僕射頃之爲吳郡太守卒諡穆子

張繹字士和郡人學道講經理致深密詞端華辯當時所宗梁武帝雅相欽賞時陶隱居著法檢論明釋老二教繹往復討論甚有條理隱居嘉焉專心道法居貧守約善八體書別製雲篆作茅山南洞碑甚工

太平經

張昭字德明弟乾字元明吳人昭幼至孝父煥病消渴嗜鮮魚昭結網捕魚以供弟乾聰敏好學亦有至性父卒兄弟並不衣綿不食鹽醋日食一升麥屑粥每感慟必歐血父服未終母陸氏又卒兄弟毀瘠骨立家貧未得大葬布衣蔬食十有餘年衡陽王伯信臨郡舉乾孝廉固辭兄弟因毀成疾昭一目失明乾亦中冷苦癰年未五十並終于家嗣息俱絕

張仲字叔元郡人仕陳左中郎將好覃思經典撰春秋義略喪服孝經論語義前漢音義官至漢王侍讀張後允字嗣宗崑山人祖僧紹梁零陵太守父冲陳國子博士入隋爲漢王諒并州博士後允以學行禪其家以經授太宗封新野縣公終散騎常侍諡曰康

張承休後嗣孫。張說撰其墓志云。後嗣之子小師。小師生承休。承休希言篤行。去華崇實。非法不由。非禮不動。精於理物。敏於從政。歷朝議大夫。上柱國。恆州刺史。說之文曰。昌門一分。暉我諸侯。蓋居昌門云。張鎰字季權。後嗣五世孫。父齊邱。朔方節度使。東都留守。諡貞獻。鎰累殿中侍御史。將救盧樅死。白其母曰。樅免而鎰貶。默則負官。貶則爲太夫人憂。母曰。兒無累於道。吾所安。遂執正其罪。坐貶撫州司戶。建中二年。拜中書侍郎。平章事。盧杞忌鎰剛直。擠之出。爲鳳翔隴右節度使。帝幸奉天。鎰罄家貲。將自獻行在。營將李楚琳嘗事朱泚。夜率其黨作亂。遂遇害。史臣曰。鎰暴忠王室。爲賊姦所乘。以致其身。蓋福善禍淫之訓。有時而撓。要躬可殞。而名與岱嶽等矣。

張從師。郡人。張說撰其墓志云。河南府法曹參軍。有唐逸士。吳郡張從師。沖和純粹。辯博閎達。卓犖好古。儻蕩逸羣。秀才高第。歷官五政。忘懷樂道。如浮雲無心。野鶴獨立。上元二年終。葬虎邱西原。子惟儉。惟靜。弱歲皆精。左氏穀梁春秋。弟從申。時爲祕書省正字。從師祖損之。隋侍御史水部郎。損之生滋。碩學麗藻。名動京師。從師之父也。從申自有時名。書法甚高。

張旭。吳人。草書嗜酒。每大醉。呼叫狂走。乃下筆。或以頭濡墨而書。旣醒。自視以爲神。不可復得也。世呼張顛。初仕爲常熟尉。有老人陳牒求判宿昔。又來。旭怒其煩。老人曰。觀公筆蹟奇妙。欲以藏家爾。旭因問所藏。盡出其父書。旭視之。天下奇筆也。自是盡其法。後人論書。歐虞褚陸皆有異論。至旭無非短者。傳其法。惟崔邈。顏真卿。文宗時。詔以李白歌詩。裴旻劍舞。張旭草書爲三絕。

張僅字幾道與里人顧棠字叔思皆客於王荊公公作三經義二人與焉僅至著作佐郎卒方子通作挽詩極哀楚誦者爲出涕吳人因目子通爲方挽詩

吳郡聲名顧與張龍門當日共升堂青衫始見登華省丹旌俄聞入故鄉含淚孤兒生面垢斷腸慈母滿頭霜可憐十載人間

事不及南柯一夢長

# 吳郡志卷二十五

## 人物

楊收字藏之。父遺直。客死姑蘇。收七歲而孤。遂居吳。處喪若成人。母長孫親授經。十三通大義。善屬文。所賦輒就。吳人號神童。里人多造門觀賦詩。至壓敗其藩。懿宗時。以中書侍郎同中書門下平章事。子鉅。散騎常侍。鑄。戶部尙書。

徐修矩。吳人。仕爲恩王府記室參軍。奕世才賢。承家介潔。守世書萬卷。優游自適。有潮田五萬步。草屋十數間。不復出仕。皮日休嘗就借書讀之。與任晦同時。日休與陸龜蒙作二游詩。謂修矩與任晦也。

任晦。吳人。仕爲涇縣尉。退居里中。有深林曲沼。危亭幽砌。池中又爲島嶼。修篁嘉木。掩映隈奧。晦資高放。寡合。好奇樂異。喜文學名理之士。得顧辟疆舊圃以居。松陵集

孫發。吳人。舉百篇科。皮日休贈以詩云。百篇宮體喧金屋。一日官銜下玉除。陸龜蒙亦云。直應天授與詩情。百詠惟消一日成。其見推當時如此。後未有繼之者。

皮光業。字文通。父日休。爲蘇州從事。光業生於蘇。十歲能屬文。錢武肅王鏐辟以爲屬。吳越國建。以爲相。教令儀注。多其所定。美容儀。善談論。若神仙中人。吳越備史

殷宅。字昌從。少負志氣。博學善屬文。弱冠遊太學。籍甚公卿間。天寶末。知天下將亂。乃趣裝東歸。侍母居。

吳郡吳中士大夫得從之遊者鄉黨以爲榮採訪使李希言辟爲從事奏授試崑山尉不就子侑遂顯宦

馮宿集

吳仁璧大順中及第喜屬文精星學及黃白術初學於廬山道士數年其師曰能罷卷學仙乎仁璧固陳求名之志道士曰一第取之拾芥耳但它年從宦勿干英雄仁璧旣成名錢武肅王待以客禮訪以天文固辭非所知欲辟幕職又以詩辭及秦國夫人薨武肅具禮幣請爲志又不從遂爲錢氏所害其女亦善星學仁璧被繫女仰瞻而泣曰文星失位大人其不免乎

備史遺事

溫訥蘇州人吳武忠王楊行密時爲大將劉威幕客行密卒威爲帥府所忌或譖之於徐溫溫將害之訥說威曰公受謗雖深反本無狀若輕舟入覲則嫌疑皆亡矣威從之溫果待威甚恭威得遠鎮訥之力也司馬福郡人始隸吳越王水軍淮人圍姑蘇置柵環城內外阻絕王遣救兵至莫知城中音問福能水中行總帥因遣入城淮人設網縣銅鈴鐵鱗過之必覺福以巨竹觸網淮人聞鈴聲亟舉網網舉而得度或浮水上則戴萍苻而行因得入城旣而復出凡在水中三日及救兵與城中弓矢相應淮人以爲神軍中皆服福奇才進官都指揮使吳越王城吳江置軍鎮命福主之許老於職至國初不絕

備史遺事

丁偃蘇州進士試邇英延講藝詩云白虎前芳掩金華舊事輕天心非不寤垂意在蒼生有古詩諷諫之體偃是歲奏名甚高御前下第自是二十年始及第

溫公詩話

鄭夷甫郡人少登科有美才嘉祐中監高郵軍稅遇一術士能推人死期無不驗推夷甫命不過三十五

歲感歎叵堪。有人勸其讀老莊以自廣。久之。潤州金山一僧。端坐與人談笑。問化去。夷甫聞之。喟然歎息。既不得壽。得如此僧。復何憾哉。乃從佛者授楞嚴經。往還吳中。歲餘忽有所見。曰。生死之理。我知之矣。遂釋然放懷。無復芥蒂。後調封州判官。預知死日。先期旬日。作書與交遊親戚訣。及次。敍家事備盡。至期沐浴更衣。公舍外有小園。面溪一亭。夷甫至其間。親督人洒掃。及焚香。揮手指畫之間。屹然立化。家人奔出呼。已僵立。亭亭如植木。一指猶作指畫之狀。郡守而下。少時皆至。士民觀者如堵牆。明日乃斂。高郵崔伯易爲墓誌略敍其事。墨客揮犀筆談

謝濤字濟之。淳化三年進士。幼奇敏。講學陽山澄照寺。吳令羅處約。長洲令王禹偁。皆與定交。處約謂禹偁曰。濟之揚摧天人。吾曹敵也。由此聲名益顯。真宗卽位。銳意人物。內出濤等二十四人治狀。會京東強寇起。召知曹州。歷三司判官。兩浙轉運使。侍御史。直昭文館。知越州。權西京留司御史臺。就拜祕書監。朝廷嘉其恬退。擢太子賓客。其爲侍御史。清靜端介。百辟望其風采。及分務。悉屏去外累。不復親筆硯。曰。佚我以老。日閱舊史一卷。以代賓話。弟炎有文名。與盧植齊名。時謂之盧謝。

謝絳字希深。濤子。祥符八年進士。召試館閣校勘。上疏言國家當以土德王天下。又言真宗當配上帝。議不合。河決滑州。又言災異衆多。宜深自引咎。損膳于朝。罷不急之役。省無名之斂。以休息天下。又請罷內降。詔令皆由中書樞密院。而後施行。因進聖治五箴。遷知制誥。出知鄧州。卒。子景初。景溫。景平。景回。龔識給事中。真正字犯孝廟諱嫌名儀之子。端拱元年進士。大中祥符間。翰林學士。李宗諤薦擢監察御史。遷殿中。

侍御史兼左巡使。本朝襲唐製。御史不專言職。至是始擇學術醇正。操履端方。可綱紀朝廷者。俾入臺言事。識始被選。後以目疾求退。除檢校司封郎中。平江軍節度使。本朝吳士登科者。始於識。今府學先達題名。以識爲首。識之後。有宗元等。列於後。其家至今居崑山黃姑。猶藏其登第時金花榜貼。乃用塗金黃紙。闊三寸。長四寸許。大書姓名。下有兩知舉花押。又用白紙作大帖。如藥貼狀。貯金花貼於中。外亦書姓名二字。蓋以此報其人也。自唐以榜帖相傳。而世少見其制。故附於此。

丁謂。字謂之。長洲人。少與孫何善。袖文謁王禹偁。大驚重之。以爲自唐韓愈、柳宗元後。二百年始有此作。世謂之孫丁。淳化三年。進士甲科。累遷夔州路轉運使。蠻酋爲寇。謂諭以禍福。蠻感泣作誓。刻石立境上。五年不得代。詔舉自代者。乃入爲三司鹽鐵副使。大中祥符五年。參知政事。九年。請外。爲平江軍節度使。知昇州。天禧初。復參政。改樞密使。代寇準拜中書門下平章事。加司空。晉國公。仁宗卽位。進司徒。侍中。爲山陵使。授太子少保。分司西京。又貶崖州司戶參軍。在崖五年。累徙光州。授祕書監。致仕卒。年七十二。謂機敏有智謀。文字累數千百言。經覽輒誦。善談笑。爲詩。至圖畫博弈音律。無不洞曉。嘗建鄉郡節餞。以至宰相。國朝吳人至相位者。始於謂。又嘗爲鄉里請於朝。特免丁錢。鄉人至今德之。祠於萬壽寺。

許洞。字洞天。吳縣人。父仲容。太子洗馬。洞疎雋。幼習弓矢擊刺。長折節勵學。精左氏傳。咸平三年。第進士。爲雄武軍推官。詣府白事。有倅踞坐不起。卽移書責知州馬知節。知節怒。劾之。除名。歸吳。所居常植一竹。以表特操。吳人至今詠之。曰許洞門前一竿竹。日以酣飲。嘗從民坊貰酒。大有所負。一日忽書壁作酒歌。

數百言。人爭往觀。其酷數倍。景德中。獻所撰虎鈴經。應籌策科報罷。封太山。祀汾陰。獻三大禮賦。卒於烏江主簿。

劉少逸。年十一。文辭精敏。有老成體。其師潘閔。攜以見長洲令王元之。吳縣令羅思純。以所作贊二令。二令名重當時。疑所贊假手。未之信。因試之。與之聯句。略不淹思。思純曰。無風燈焰直。少逸曰。有月竹陰寒。元之曰。一回酒渴思吞海。少逸曰。幾度詩狂欲上天。凡數十聯。皆敏妙。二公驚異。聞于朝。賜進士及第。官止尙書員外郎。續歸田錄

祝庶。幾郡人。通象緯之學。累赴鄉舉。不中第。景德中。求試所習。以爲司天靈臺郎。

徐祐。字受天。擢第爲吏。以清白稱。慶歷中。屏居吳下。日涉園廬。以自適。終左司員外郎。年七十五。

鄭戢。字天休。吳人居皐橋。九歲而孤。長客京師。師事楊億。天聖三年。進士第三。累歷龍圖閣學士。知開封府。戢強敏善聽決。假貸細民。繩治豪宗大姓。流姦吏馮士元于海島。執政盛度。程琳皆坐黜。朝議畏其鰈核。康定元年。同知樞密院。出知杭州。發丁數萬。開闢西湖。民賴之。歷陝西四路都總管。經略安撫。招討使。行邊至鎮戎軍。天寒。與將佐置酒。會塞塵起。有報西戎至。戢云。此必川兵按邊回耳。非賊騎。已而果然。以資政殿大學士知并州。時契丹與元昊交惡。邊奏互上。獨戢不以聞。上問。戢對。戎狄相攻。中國不足憂。仁宗嘗曰。戢氣質英豪。朕欲爲相。故屢試於外。尋爲宣徽北使院檢校太保。奉國軍節度使。卒。年六十二。贈太尉。諡文肅。

吳感字應之以文詞知名。天聖二年省試第一。九年中書判拔萃科。仕至殿中丞。子純。文行亦高。鄉人目曰吳先生。

元絳字厚之。居帶城橋。天聖五年進士。屢典大藩。以文章政譽名一時。神宗欲選翰苑之才。王荊公曰。有眞翰林學士。恐不能用爾。遂自外召入翰林。未幾參知政事。事詳在國史。後以太子少保致仕。還吳中。與程公闢諸公爲九老會。鄉人號其居曰衰繡坊。卒年七十餘。有玉堂集三十卷。

程師孟字公闢。郡人。其高祖思爲錢氏營田使。遂居吳。師孟居南國側。號畫錦坊。景祐元年舉進士。累遷判三班院給事中。判將作都水監。歷知楚。遂。洪。福。廣。越。青州。爲政簡而嚴。剏煩制劇。才刃有餘。罪非死者。不以屬有司。獄每爲空。寬猛得中。所至人悅。性樂易純質。言無隱情。喜爲詩。効白樂天。而尤簡直。至老不改吳語。累官光祿大夫。致仕年七十八。樂圃朱先生伯原少許可。言師孟爲政。則曰雖韋丹治豫章。孔戣帥嶺南。常袞化七閩。無以加也。天下以爲才。卿吏師米芾亦云。廣平公以文學登科。以政事躋顯。以言語出疆。以恬退告老。足之所及。功利蔚起。云有詩集二十卷。奏議十五卷。

盧秉父革。本德清人。舉神童。慶歷之後。累歷監司。有聲。請郡自效。神宗嘉其恬退。未幾告老。累進太子賓客。官制行。累改通議大夫。退居於吳。年八十二。今盧提刑橋。因其宅以名其家。遂爲吳人。秉皇祐元年進士。元豐中爲發運使。父革退老於吳。秉每歲上計。必請還鄉省侍。後帥涇原。懇辭歸養。手詔慰勉。時以爲榮。

龔宗元字會之。慎儀之孫。幼穎悟絕人。讀書虎邱。爲鄉貢首選。天聖五年擢第。范文正公謂之曰。君器業清修。它日必爲令器。謹勿因人以進。宗元後登朝。未嘗遊公卿門。文正之教也。終都官員外郎。宗元始以都官分司南京謝事。取白居易詩作中隱堂。語在園亭條。子程孫況皆繼登科。龔程字信民。剛正自守。不怵於禍福。力學排異端。家不設佛老像。祭祀不焚紙錢。讀書南峯。攻苦食淡。遂博極羣書。鄉人號有脚書廚。熙寧六年第進士。終桐廬令。子況。

龔況字濬之。崇寧五年進士入館。以學術文章與蘇過在朝俱知名。時號龔蘇。用宗元中隱故事。自號起隱子。終祠部員外郎。有起隱集三十卷。

孫載字積中。崑山人。曾祖漢英。仕錢氏爲蘇州崑山鎮防遏使。遂爲縣人。載治平二年第進士。歷廣東河北淮西使者。知海沂。婺亳州。治務大體。時號循吏。以嘗薦元祐黨人。遂丐歸。一日徧謁先壠。及嘗與往來者呼妻子與訣。問日早晏。盥手焚香而逝。年七十五。

丁隲吳人。元祐中嘗爲左言。五上章論何正臣治獄殘酷。巧詆刻深。甚於羅織黨錮。事載國史。

侍其沔。字國紀。上世自高密徙吳。學貫穿經傳。與人交如淡薄。遇其急。奮義以往。不避艱險。五舉禮部。退爲鄉先生。治平三年沒。門人弟子相與議其治行。諡曰夷晦先生。滕元發志其墓。云士生斯世。有進取出力。得時行道。功烈被於民者。有行義修潔。退而講學。爲一鄉之善士者。斯二者。用捨不同。要皆天下之強立君子也。善士蓋指沔。其慕尙之如此。